

# ለናይ ሰልፍ መግርክ 60ታት

8ይ ክፈ



## መሐመድ እድሪስ

ሐቆ ሐርብ አዳል፡ ለበዝሐው ምን ዴሽ ሱዳን እንዴ ትሳርሐው እት ከሰለ እንዴ ትገሰው መናዱቅ አስክ መጽአም ልታከው ለዐለው መዋጥኒን፡ “አዜ ሚ ኒዴ፤ ሓምድ ስለሕ ጥወር አለቡ፡ ለእሉ ረክብ እልናመ ናይ ስኒን ቀዳም ስለሕመ ሐድ ቱ። ከንትለዩ ገብእ መ ንጽነሕ፤” ለልብል ሰኣት ሀረሰው። ትም እት ልብሎ እግል ኢለዐርወ፡ ምን እድሪስ መሐመድ አድም እጃዘት ሐዘው። ምን ሓምድ እግል ኢልእዘሞመ ዔብ ገብአት እቶም። ወሐር ክልአት ለልትለአኮ እግሎም አንፋር ሐረው። ህሌነ ምስልክ እግል ሊበሎ፡ ዐብደለ እድሪስ ለልትበሀል መዋጥን ጥለግ አስክ ሓምድ እግል ለአብጼሕ፡ መሐመድ አድም ገሲር ህዬ አስክ ካይሮ እጃዘት ለልትሰአል። ዐብደለ እድሪስ እብ ልብሰቱ ምን ገብእ ወሄራሩ ምስል ሸዐብ እግል ልትመሳሰል ለቀድር ወለባካት ሰኒ ለልአምር ቢንግምራይ እንዴ ትበሀላ ቱ ለትሐረ።

ምንለ ዐለው እቱ መዐሳክር እብ ሐምሐምስ ወዐስዐስር እንዴ ትዛበው ካርያመን ለጸንሐው 75 ጠልገት እንዴ ነስአ ትበገሰ። እተ መደት ለሀ እሊመ ብዙሕ ቱ ዐብደለ እድሪስ እበ ልኡኩ ሜዳን አተ። ምናተ እት ለአንጎጌ እግሉ እግል ሓምድ ዐዋቱ ኢረክበዩ። እት ድብክ-አልገዴን ክም በጽሐ እግል ዐብደለ መሐመድ ዓምር ለልትበሀል ነፈር አሚን ለአክ ዲቡ ከአቅበለ። እሊ ጥለግ እሊ ምን ከሰለ አስክ ሜዳን ለትነደአ አወላይት ራድኢት ቱ ለዐለ። ከረ ሓምድ፡ እብ ሰቡብ ሕዳን ጥለግ፡ ሞሎኮ ልትነፍያ ሰበት ዐለው።

እግል ሐቴ ጠልገት ሐዳስ አካን አልፍ ገንሕው ዐለው። ሸዑ እት ከደን ለረክበዩ ጥለግ ጥልያን ልግበእ ወእንግሊዝ። እግል ከረ ሓምድ ነፍያም ገብእ እት ልብል ለአርዩ ከእት መአከብ ለአጸንሖም ሰውረት ኤረትርዩ እትለ ናይ ሰልፍ መትአምባት ግድለ ስለሕ ዲብ 60ታት ፍንጌ ምናድሊን ሰውረት ወጄሽ አባይ ገብእ ለዐለ መዓርክ ምን ምናድል ሀይለስላሴ ወልዱ ለከትቦዩ ክታብ ዐዋቴ ለትነሰአቱ። ከእግል ዮም ጾይ ክፈል ቱ ዐለ። ህቶም ህዩ። እግል ሸበህ ቱ ለቤለው። ተረርፍ ናይ ካልኣይ ሐርብ እዲነ እብ ዝላም ወጸሓይ ስጉር ለረከቡ ጥለግ። ለልአደሜዕ ምንመ ኢገብእ። እት መደት መሕገዝ ነፌዕ እንዴ ቤለው እት ሽነጦም ለአከቡ ወለአምሆሎ እቡ ዐለው።

ሐሸው (ባሩድ) እንዴ አፍገረው ምኑ ልትነፍያ እቡ ሰበት ዐለው ኢለኩፉ። ከአፎ ክም ለአሸቅወ ናዮም አብሳር ዐለ እሎም። እሰልፍ እብ በሰር እግል ዐረር ምነ ከብሱለት በይነ ወድው። ሐቆህ እት ረአስለ ዲብ ቀበተ ለጸንሖም ሐሸው። ክም መንደዲ ለትገብእ እሉ ክርቢት ወሱኩ ከሐር ረስለ ጠልገት (ዐረር) እት አካኑ በሉሱ ወለክፎ እበ። ለአደሜዕ እሎም ዐለ ህዩ። እለ ሸቅለት እለ ምን በዲር ለጸንሖት ወእብ ፍዕል ለልትሸቄቡ እት ገብእ። ክእነ ለመስል በሰር ሞሎኮ ልቡሉ ዐለው። ወድ-ጅግረ ለልትበህል ኖዕ ናይ መንደቅመ እብሊ አብሳር እሊ ሸቄ ዐለ። ለካልኣይ ልኡክ መሐመድ አድም ገሲር እማነት እንዴ ትከበታቱ ለትበገሰ፡- ካይሮ ክም በጽሐክ። ክሱሰን እግል ምን ዐድ አስክ መስር እት ገይስ እትለ እንዴ ሸክፈ ዲብነ ለመጽኤነ ከሰእየት ለሀቤነ ከሐልፈ። እድሪስ መሐመድ አድም እንዴ ረከብከ። “ሓምድ ከደን እንዴ ፈግረ ልትሓረብ ህለ። ንትለዩ ወለ ስለሕ ብከ አስክነ ለትልእኩ እግል ንትጸበረከ።” እንዴ ቴሉ። “እለ ልእከት እለ ምንለ አፋነ እተ እዝኑ ተአበጽሐ። ለእሉ ለሀይበከ በሊስ እንዴ ነስአከ ህዩ እብ ሸፋግ አቅብለነ ለትብል እማነት። ገሲር ምን በዲሩ እት ካይሮ ደረሳይ ሰበት ዐለ። እበዩ ክም ተአቱ ወትፈግር ለበዴ ምኑ ነፈር ይዐለ። ምድር ለልአምር ወሻፍግ ክም ቱ ምን አምነው ቱ ህዩ ለልአከው። እብ ሸፋግ እንዴ ትገበሰ ካይሮ ሰበት አተ። ለልኡኩ ኢትአከረ እቡ። ለቴለል ላኪን ክምለ መስኢቱ ኢጸንሐ።

ክምለ እለ ሐድገዩ እንዴ ኢገብእ። ኩሉ እንዴ ትቃየረ ሰእየት ለልአበትክ እንዴ ገብእ ጸንሐዩ። አሰይድ ወልደአብ ወልዴማርያም በይኑ ሸቄ። ሼኽ ኢብራሂም ሱልጣን በይኑ ወእድሪስ መሐመድ አድም ከማን እብ በይኑ። ሰልሲቶም ዙዐመ ኦሮትክ ገበይ ሕርዮት በይኑ እት ለሐዝዩ በንበን ሸቄ ጸንሐው። ምን ናይ እሎም ለልአኬ ህዩ ናይለ ደረሰ ካይሮ ቱ። እግል ኩሎም ምን ትፋህመ ምስሎም ትቀየረው ዲቡ። ኩሎም ምርክ ጽግዑ እግል ለዓቤ። እሊ ቱ መትጋድላይ። ለሀይ ቱ ለጊጉይ። እት አማን ለሀለ ፍላናይ ቱ

እት ልብሎ ሰበት ሸርሐው እሉ፡ ሸይ ክም ትኬለመ ፈሀመ። እለ ዶል እለ ገሲር፡ “ምን ሕኔት እግል እድሪስ መሐመድ ኣድም ሌጠ ልእከቹ እንዴ ኣብጸሐኮ ኣቀብል፡ ሰልሲቶም ዕጋል እግል እርከቦም ቀረርኮ” ልብል። ገሲር ሻሁድ ለገብእ እሉ እት ካይሮ ነብር ለዐለ ኣድም እድሪስ ኖር እንዴ ነስኦ ጌሶዮም። እሰልፍ እግል ኣሰይድ ወልደኣብ ወሐቆሁመ እግል ሼክ ኢብራሂም ሱልጣን ኦርቶዶክስ በይኑ እንዴ ረክበ ትፋህመ ምስሎም። ኣነ ምን ከሰለ እንዴ ትለኣኮ ማጽእ ህሌኮ። ንእቡዩ ወንፍተዩ ለንዳል ስለሕ እንቡት ሀለ። ከረ ሓምድ ዐዋቴ ሐርብ ኣንበተው ወሐበት ምን ዐፍሽ ወሰዳይት ይህሌት እሎም። ኣዜ እንቱም ሚ ቱ ስታትኩም፡ ወሚ በሊስ እንዴ ጸበጥኮ እግል ኣቅብል።” እት ልብል ትሰኣለዮም። ምን ቀዳሙመ ለንዳል እምበል ጎማቶም ሰበት ኣስተብደ፡ እግለ ሰዳይት እበ ከስስ ረኣይ ክልኢቶም ሐቴ ዐለ፡ ክምለ ለትፋህመው ዲቡ ጋር ህዩ፡ ... “እንሰዴ እንዴ እንቤ እብ ውቁል ኢንትሃጌ ወይእንሰዴ እንዴ እንቤመ ኢንትሃጌ” እት ልብሎ መውቀፍ ምግባይ ጸብጠው።

ለንዳል እንዴ ሸፍገ ኣንበቶቱመ ኢትረይሐው እሉ። ኣሰይድ ወልደኣብ “እትሊ ወክድ ጎነ እት ኣንበቶት ግድለ ስለሕ ሸዐብ ፈዛዐቱ ካፍየት ቡ መስለኩም።” ልብል እት ሀለ፡ ሼኽ ኢብራሂም ሱልጣን ህዩ፡ ‘ለእንቡት ሀለ ንዳል እብ እድሪስ መሐመድ ኣድም ለልትቀወድ ሰበት መስለ እቱ፡ “ግድለ ስለሕ እንቱም ኣንቡቱ ወብዕዳም ለኣንቡቱ እብለ ኢከስስ፡ ሸዐብ ኤረትርዩ እብ ኖሱ እግል ሐቁ እግል ልናድል እግል ልትጸገም ቱ” እንዴ ቤለ፡ ገጽ ከልኤኒ። እግል ገሲር ህይብት ለዐለት ኣግደ ፊነ (እማነት)፡ እግለ ልእከት እት እድሪስ መሐመድ ኣድም ኣብጸሐት ተ ለዐለት። እግሉመ ጌሶዮ፡ ምን ዐድ እብ ከሰለ ተሐልፍ እት ህሌክ ገለድ ለበይኣክ እሎም ምን ዴሽ ሱዳን ለትሳርሐው ህለው። ሓምድ ህዩ እንዴ ፈግረ እት ኣዳል ሐርብ እንቡት ሀለ። ኣዜ ሚ ቱ ጸገምነ፡ እብ ብትክት በሊስክ እታኬ ህሌኮ፡ ቤለዩ። እድሪስመ ክምለ ክምለ ቀዳምያም “ላኪን ሸፍገው እቱ” ቤለ። “ኣነ ሸፍገው ሚ ኣከረው ይኣምር። እብ ልኡክ ማጽእክ ህሌኮ።

ግድለ ስለሕ እንቡት ሀለ፡ ረኣይክ ሀበኒ።” “ኣነ ረኣይ እግል ሀበክ።” “ኣቤ እንተ።” በገ...፡ ምነ ምዕል ለእንተ ትትበገሳተ 12 ምዕል ዐልብ። እተ 12ይት ምዕል ኣነ ከሰለ ህሌኮ በልስ እድሪስ። እብሊ ከፌነ እንዴ ትባህለው፡ ገሲር እግል እድሪስ “እግለ ለኣከውኒ፡ እድሪስ ምስልኩም እንዴ ትዋጅህ ኖሱ እበ ኣፋሁ፡ ሚዳን ፍገሮ ኣው ኢትፍገሮ እግል ሊበለኩም ኖሱ መጽኣኩም ሀለ እግል ኢበሎም ቱ” እንዴ ቤለዩ ኣስክ ለልዓርፍ እተ ኣካን ጌሶ። ገሲር ምስል ኤረትርዩን ደረሰ ጃምዐት ዕላቀት ትርድት ሰበት ዐለት እግሉ፡ ሐብልወጠን

ምነ አሰሰው ህዩ ዎሮት ሰበት ዐለ፡ ረስሚ እግል ልርከቦም ላዝም ዐለ። ጉምዓም ሰበት ጸንሐዉ ላኪን ደስ ኢቤለዩ። እብ ለገብአት እግል ልትጋመዮም ሓሰብ ዲብ እንቱ ኖሶም በድረዉ። እተ ሰክብ ዲቡ ለዐለ ሆቴል ክልአት ምኖም መጽአዉ። ዎሮቶም እድሪስ ገላይዶስ፡ ለካልኣይ ህዩ መሐመድ ሳልሕ ሁመድ። እሎም ክልአት ምነ እሙራም ወስሙያም ደረሰ ጃምዐት ዐለው። ምስል ገሲር ለወደወ ህጅክ ኖሶም ቱ ለአትበገሰው። እተ መዋጅሁቶም እት ረአስለ ሰለስ ዙዐመ ምን ሕድ ለሰቱሩ ጋራት ክም ህለ እሎም ቱ ለሸርሐው እሉ። አስክ ከሰለ ክም አቅበለ ምስሎም ልቀእ ትሉሉይ እግል ለህሌ እሉ፡ እግል ኩሉ ለጀሬ ተጠውራት ንዓል እንዴ ታብዐ ጀላብ እግል ልራስሎም፡ ለገብአ ነፈር እግል ለኣምሩ ለአለቡ ስቱር ዕልብ ቡስጠት እንዴ ሀበዉ ትሳርሐው ምኑ።

ገሲር እግለ በሀሎም ኢትቃወመዩ ወይአየደዩ፡ ለሀበዉ ቱ ዕንዋን ሌጠ እንዴ ነስአ ምኖም ሳርሐዮም። ፈጅራተ፡ ገሲር አስክ ከሰለ ለትበገሰ ዲብ አምዕል፡ ልሰዕ ዲብ ምስካቡ እት ህለ፡ ጽቤሕ ምድር ሳዐት 6:00 ለገብእ፡ እድሪስ መሐመድ አድም ባብ ከርከሐ ኢቡ። ቅድየቶም እትሙማመ ከፍኑቱያም እት እንቶም፡ ካልእ ዶል ለልአትራክቦም ሸይ ሻፍግ ይዐለ እሎም። እድሪስ ላኪን፡ ለአመጽአ እግለ ጋራት ዐለት እሉ። ገሲርመ አምረ ዐለ፡ ለሰአዩ ምኑ ሰበት ዐለት። እትለ ሰልፋይት መዋጅሁቶም ክልኢቶም ቁጽባም ሰበት ዐለው፡ እግል መፋህመት ተ ለምጽአት። ለአትቃጸቦዮም ህዩ ሚ ቱ ገብእ፤ ገሲር እብ ክሱስለ አምጸአቱ ቀድየት፡ ወህተ ህዩ ቀድየት ወጠን ልትሃጌ እት ህለ፡ እድሪስ እት ሕሳባት እንዴ አተ አስቀበ። እሊ ለረአ ገሲር፡ እንዴ አዝመ ምኑ እግል ኢሊጊስ ለእኩቱ በሊስ አለበ እግል ኢትግበእ ምኑ ሰበት ፈርሀዩ፡ ላኪን እግል ኢልእዘም ምኑ ሰበት ኢከሀለዩ አትዐገበዩ። እብለ ለመጽአ ክላፍ ክልኢቶም ቁጽባም ሰበት ዐለው፡ እድሪስ ዐፎ እግል ልጥለብ ቱ ዲብ ገሲር ለአግወሐ ከመጽአ። ክእነ ህዩ ቤለዩ፡ ማሌ አነ ወእንተ እኩይ ወዴነ፡ እብ ምሽክለቲት ንኢሽ አክተለፍነ። አዜ ህዩ፡ ጋሻይ እብለ ሳደፈዩ ሰበት ደግም፡ እግል ኢትዳግሙ እንዴ እቤ ቱ ለመጽአኮከ። እሊ ክላፍ እሊ፡ እት ፍንጌዩ ወፍንጌከ ልትረፍ። ለናይ ማሌ ኩሉ ረአሱ ኢልትፈቀድ፡ ትረስዑ ምንከ። ገሲርመ ኢካለፈዩ። ዐፎ-ዐፎ እንዴ ትበሀለው፡ እብ ዐዙመት ናይ እድሪስ፡ እት ሐቴ ገሀወት ዐባይ ስምጥ ደፋረት ብሪጣንዩ አፍጠረው። ገሲር አስክ ከሰለ ወህቱ አስክ ቤቱ ትፈናተው።